



UNIVERSITÄTS-
BIBLIOTHEK
PADERBORN

Crisis Theologica

Cárdenas, Juan de

Sevilla, 1687

Cap. VI. An opinio docens, satisfieri præcepto per duas medietates Missæ successive auditas, maneat damnata, saltem virtualiter?

[urn:nbn:de:hbz:466:1-75689](https://nbn-resolving.org/urn:nbn:de:hbz:466:1-75689)

CAPVT VI.

*An opinio docens, satisfieri
præcepto per duas medietates
Missæ successive auditas, ma-
neat damnata, saltem vir-
tualiter.*

SVMMARIVM.

*Dupliciter potest contingere, quod due
medietates Missæ successive audi-
antur. num. 50.*

*Neutra ex his duabus opinionibus ex-
presse damnatur. num. 51.*

*An sit consequentia à successiva au-
ditione medietatum Missæ ad si-
multaneam? num. 52.*

*Successiva auditio duarum medietatum
Missæ non damnatur, etiam
virtualiter. num. 53.*

50. **A** Vthores docentes satisfieri præcepto per duas Missæ medietates successive auditas, dividuntur in duas classes: alij enim admittunt, etiam si pars posterior prius, & prior posterius audiatur; alij vero solum admittunt, dummodo prior prius, & posterior posterius audiatur. De vtraque ergo opinione inquirimus, an damnata maneat aliquo modo vi huius decreti.

51. Illam vtramque non manere damnatam expresse vi huius decreti certum est. Nam hoc decretum dumtaxat loquitur de opinione, quæ admittit, satisfieri præcepto per auditionem simultaneam duarum medietatum Missæ à duobus Sacerdotibus: non ergo loquitur de auditione successiva.

52. Maior difficultas est, an ea opinio vi huius decreti maneat virtualiter damnata. Et ratio dubitandi est. Manet enim virtualiter damnata

omnis ea propositio, quæ est impossibilis cum damnatione. Et ideo propositio, quæ est antecedens, vnde infertur propositio damnata, est virtualiter damnata: quia bene valet ab opposito contradictorio consequentis ad oppositum contradictorium antecedentis, & ideo bene valet à contradictoria propositionis damnatæ ad contradictoriã antecedentis, quod infert propositionem damnatã: sed propositio, quæ ad mittit satisfieri præcepto per successivam auditionem duarum medietatum Missæ, est antecedens, vnde infertur, quod satisfiat etiam per simultaneam auditionem earum: tum quia Pater Suarez, & alij eam consequentiam colligunt; tum quia præcipua argumenta, quæ militant contra simultaneam auditionem, militant etiam contra successivam; vt constat ex cap. præced: ergo ea opinio de auditione successiva duarum medietatum manet virtualiter damnata.

53. Dicendum tamen est, neque virtualiter manere damnatam eam opinionem de auditione successiva duarum medietatum, siue pars prior, siue posterior audiatur prius. Ratio est: Nã, vt propositio maneat virtualiter damnata, debet esse evidenter incompatibilis cum damnatione, siue debet esse antecedens, vnde inferatur evidenter propositio damnata: atqui quamvis valde probabiliter opinio de successiva auditione inferat opinionem damnatam de simultanea auditione duarum medietatum Missæ, vt constat ex ratione dubitandi proposita; ast non illam infert evidenter, & consequenter non est evidenter incompatibilis cum ipsa damnatione. Et hinc patet responsio ad rationem dubitandi.